

# «Je Suisse» u la nova litteratura svizra

■ (anr/vi) Il titel di gia bler. Pia Reinacher scriva da la situaziun actuala da litteratura svizra e dat al cudesch ch'è gist cumparì il titel «Je Suisse». Ella constattescha ch'ils novs scripturs e las novas scripturas s'empipan da la politica da l'agen pajais. Entant che la generaziun veglia dals onns 68 ha adina preferì ina litteratura engaschada cun concepts politics, van ils novs litterats tut a la mita autras vias. Reinacher raquinta co ch'ils vegls scripturs han vulì sa liberar per tut pretsch da lur babuns ed han vulì rumper cun sfracass cun tradiziuns. Ils auturs dad oz na fan nagina revoluziun pli, els gnanca sa distanzieschan da las reglas veglias ch'ils 68ers han mess si. Ils texts giuvens na sa fatschenta betg cun la Svizra sco tematica. La nova tematica è il microcosmos da l'atgna biografia. La Svizra daventa en questas retschertgas davart l'atgna vita sin il pli anc il lieu d'acziun, n'ha dentant nagina funcziun politica pli.

Reinacher constattescha era ch'ina bella ritscha da giuvens sco Zoë Jenny, Peter Weber e Peter Stamm publitgeschan ediziuns che surpassan tut quai che scripturs da la generaziun veglia enconuschan. Ils trais giuvens han immediat gè success. Las chasas edituras han era vendì en l'exteriur massa cudeschs da Jenny, Weber e Stamm. Las ediziuns èn vegnidas transladas en autras linguas. Da talas relaziuns han ils vegls auturs reconuschids da la Svizra adina be pudì semiar.

Reinacher skizzescha il svilup dals ultims onns. Ella preschenta ils novs auturs. Tranter quels sa chatta p.ex. era Silvio Huonder che na tutga cun radund 50 onns segir betg tar ils giuvens. Tutina suonda el cun ses cudeschs «Adalina» ed «Übungsheft der Liebe» la lingia dals giuvens contemporans.

«Je Suisse» na preschenta betg sulet ina survista, mabain fa era quaidas da fufragnar en cudeschs d'auturs ch'ins n'enconuscha anc betg.